

He nui te tangi o te tangata ki tenei wahine. Otira kaati mai ano tatou. Kei te mihi, kei te whakamiharo te ngakau mo te nui te tangi o nga pakeha o Turanga nei otira o te motu katoa.

Katahi ano ka kitea atu te aroha nui o te pakeha kia Te Huinga. Timata mai i te kaainga tae noa ki te urupa, kaore rawa he waahi i puare, nga rori i nga taha, e tu ana tena mahi ate ka, i ro taiapa tera mahi ate whanau, koroua, tamariki, rite tonu te tangi i te mea e haere ana te amo. E tika ana kia kiia 'Nui ke ake i te ra tanumanga o Timi tenei. Tika tonu hoki, i te nui o nga tikanga whanui i whawhatia e tenei wahine. Te iti te rahi i maharatia katoatia e ia, otira te iti rawa o te tangata, te pakeha, te maori rite tonu kia ia.

I te ra ka nehua nei, motu ana te aho o te ngakau. Haere e kui me ou nui me ou rahi.

Ma ou tamariki me ou mokopuna, ki te waingohia, e takahi ou tapuae ki nga maunga teitei i takahia e koe. Ina te Iwi, ina te hapu, ina te riu o Turanga marake ana, ina nga parae roa o Manutuke takoto noa:—

*Taku manawa i roto ra,
Rere ake ana kei taku i-hu.
Na te reo karanga ka pa ma-i
Ka maunu ra ia te taniwha nei i te ru-a.*

*Turanga-makau-rau takoto no-a
Ka riro ra ia koutou e hika ma ki te ma-te.
Ma koutou e whakaoti atu
Na Tu-Te-Puaki.*

Tena korua nga kai hautu o Te Toa Takitini. Heoi nga mihi. Kei te whakahe ahau ki etahi o nga korero a Te Taite Te Tomo i puta ra i roto i nga Moteatea mo te waiata 154.

Ko taua waiata na Waipuarangi no N'Hinemanu me N'Upokoiri, i Waiatatia ki Mokai-Patea kei Te Awarua, he whenua no Te Perohuka no N'Tuwhirirau. I nga ra o te pouritanga haere tahi tonu ai enei iwi, ka mate ki Otaparoto ki Te Retoatara. He matenga o Tanguru ka marautia, koia a N'Marau; ka roia nga piro o etahi ka kiia ko Te Roikuku. Ahakoa nga noho roa i Horowhenua tuturu tonu te noho tahi a enei hapu i reira, i Moutoa, i Manawatu.

No te hokinga mai o nga hapu nei ki Heretaunga, ka mauria mai a Te Wiremu me tona whanau, ka whakanohoia nei ki Te Aute Kareti. Ko nga uri a Waipuarangi ko Hanara ma e noho mai ra i Omahu, a, ko a Te Perohuka ko Nepe raua ko Tipene Te Apatu, heke, mai kia matou ko aku taaina.

Ina te hangaitanga o te takoto o tenei waiata:—